

Pontenôvu

O Còrsu, avà stammi a sente,
Patriottu au sangue ardente,
Spanna lu còre e la mente,
Pensa a li to antibaponi
Chi casconu in si chjacconi.

Dà un'ucchjata a se fianchere
Di Lentu e di le Custere,
Quì funu le lotte fiere
Di l'Indipindenza corsa
Chi tolta ci fù di forza!

Sottu le so triste sponde
Tra si scogli a mezz'a l'onde,
Pontenôvu pienghje e asconde
L'eroi di tante pròve
Morti ind'u sissantanôve.

O trennu viaghja ad'asgiu,
Fa silenziu e rendi omasgiu,
Quì simu in pelegrinagiu,
Ci manca lu monumentu
Tocca a noi a fallu quentu.

Ponte Leccia

Au *Buffet* di Ponte Leccia,
Magna in furia e bei in freccia,
Leccati appena di feccia.
Si tu un porti tuvaghjòlu
Stringniti lu currihjàlu.

Trinnichellu è pocu in cricca,
Zampetta ma un parte micca,
A pròva s'ella si ficca!
O Còrsu, sia paziente,
Quì un simu a lu cuntinente.

Dite zò! cara cummare,
Erpia quant'ella di pare
Prima ha da spiegà un affare
A Mansiu Cuppulatinu,
Chi vendi òliu balaninu.

Si di Golu, franchi a riva
A Morosaglia s'arriva:
Viderè a casa nativa
Di lu corciu Generale
Lu gran **Paoli Pasquale!**

Francardu

Curaggiu, simu in Francardu
Cu tre òre di ritardu,
Ma un ti ne piglià riguardu,
Un n'è cusì spaticata
Di taglià sta rigrirata!

Avà dimu addiu a Golu
Chi si face muntagnòlu
La coda pone in Niòlu
Pè a *Scal'a Santa Regina*
Chi da Castirla è vicina.

Omessa

Avale simu in Omessa
Trinnichellu l'un si pressa,
Dice: la paga è listessa.
Trizzinate jambe e denti
Scrivate a i vostri parenti!

Soveria

Ma intunate un'altra seguia,
State alegri chi a Soveria
Surteremu di a miseria
Ind'un fisciu e a passi corti,
Lu trennu si tira in Corti.

Corti

Eccu annantu a su sciappale
Di Sambucucciu e Pasquale
L'intrepid~~da~~ capitale
Chi magra cala lu spinu,
E lagna lu so distinu.

Per un fà troppu favori
All'eredi di Gaffori
E pocu a li viaghjadori,
La gara nesca e luntana
L'hanu posta in purittana.

O Corti, città leale,
Di le speranze nustrale
L'un senti sbattulà l'ale?
Morta l'un n'è la sumente,
Torna e tira la surgente.

A chi vòle visità
Le sculiscie di a città
Li tocca di sunnuttà,
La stanza, in gara, è pulita
Ma la pagate salita.

Si bò sintite appetitu
C'è u *Buffet* bellu e squisitu,
Ne surtite impanzacchjtu
Ma impanzitu è ancu lu prezzu,
Lampa sette franchi e mezzu!

Pogghiu-Riventosa

A chi un ha maccu lu cogghju
Torna e ribomba lu roghju,
Da Corti cullemu au Pogghju,
Un cuntate li tunnelli,
Sò a banda cume i sturnelli!

In Antisanti e Prunelli
Ci ballanu i vintulelli,
Quì ci spiumanu l'acelli!
Tinite u cappellu in manu
Sinnò fala in Tavignanu!

Pogghiu un manca d'òmi dotti,
Di distinti patriotti,
Li Leonardu e Carlotti.
Ai tempi di Sarracini
C'eranu i palazzi fini.

In sa puntizzina ascosa,
Bianca e nera e tosa tosa,
Un vedi la Riventosa,
Chi in trenta pigghjòli appesi
Rimira trenta paesi.

Feghja sta splendida Conca
Vivariu, Corti e Tralonca,
Boziu e Rogna chi la tronca
In d'Inzecca juncherese
E l'apponta au Vizzanese.

Santu-Petru tende a manu
A tuttu lu Mercurianu,
A Sant'Andria e Sermanu
Chi la danu ad Altiani,
Pedicorti e Ruspugnani.

Venacu

Vignale è un bellu paese,
Ma s'aghju da dà le prese
Le daria au Venachese;
Garbatu è di caramusciu
S'azzincà lu trenu all'uscio.

Trinnichellu a mezza piazza
Stinza la so carrapazza.
Passa e vene, bôga e spazza,
Tra lu Lugu e lu Serraghju,
Da in su a tutt'u Pumaghju.

Una gara cusì a pianu
In Còrsica u fattu è stranu
Si ne stona l'andaccianu,
Or, cumu fattu averanu?
Dumanda lu paisanu.

S'ella vi pare incredibile
Una meraviglia simile,
Sappiate chi l'impossibile
Un fù fattu da l'Inglesi,
Lu fecenu Venachesi!

Trapassemu lu Serraghju;
Eccu u Monte marmeraghju
Chi cavalca un calancaghju.
Piantate a lu Ponte-Vecchju
Chi sottu c'è un bellu specchju.

Ponte-Vecchju

St'halta un n'ha case ne fiori
Ma, d'aostu cu i calori
Ci sbarcanu i piscadori.
Ciottanu in si pilagali
E caccianu burdinali!

Avà, fate cuniscenza
Di cio chi l'arte e la scenza
Impalponu d'avertenza.
Mittitevi a lu purtellu
Intrimu ind'un macinellu!

Pigliatevi pazienza
Quì a Còrsica in penitenza
Acquista piena indulgenza.
Ringraziemmu l'ingigneri
Chi un fecenu da sumeri.

Trinnichellu fiaccu e cassu
Quì s'atteppa, passu, passu,
Senza fiscu ne fracassu.
Fidiegghja li Muracciòli
E grida: ajutu, ò figliòli!

Attaccate bôie e muli
Attenti, chell'un rinculi!
Ch'ellu un n'iscrocchj e ci sbuli
In fondu di su vagliu
E ghjucacci au masterminu!